



Mam bee M yambã tẽ-sõng puga, M bee ne-a a sẽn wat n tẽegd Mam yuurã

Yii a Abu Hurayrat nengẽ, (Wënd yard be a yĩnga), a yeelame: Wënd Tẽn-tuumã yeelame, (Wënd puusg la A tũgr be a yĩnga): «Wënd yetame (A Naam zẽk yã): Mam bee M yambã tẽ-sõng puga, M bee ne-a a sẽn wat n tẽegd Mam yuurã, rënd a sã n tẽeg Maam a mengẽ wã, M tẽegd-a-la M Mengẽ wã, a sã n tẽeg Maam zama pugẽ, Mam tẽegd-a-la zama pugẽ sõmblem sẽn yud zamã-kãngã, a sã n bao pẽnegr ne Maam nug-yakemde, Mam pẽnegd-a-la ne kãntuga, la a sã n bao pẽnegr ne Maam ne kãntuga, Mam baooda pẽnegr ne-a ne nug-loore, la a sã n wa Mam nengẽ t'a yaa sẽn kẽnde, M wata a nengẽ tĩ M yaa sẽn zãoosde».

[Naşun Şahuhun (Gom-sikdem sẽn manege)] [B zemsa taab a zugu (A Al-Buḥariy la a Muslim n reeg-a)]

Nabiyaamã kõo kibare (Wënd puusg la A tũgr be a yĩnga) tĩ Wënd (A Naam zẽk yã) a yetame: Mam bee M yambã tẽ-sõngẽ ne Maam, rënd M tumda ne M yambã n zems ne yẽ sẽn tar tẽ-sõng ning ne Maamã, la rënd a yaa sẽn tũ ne yẽnda sẽn tar tẽeb ne yel-sõmde la zũnuubã yaafa, M leb n maanda bũmb ning a sẽn tẽed Mam nengẽ sẽn yaa sõma la zẽng sẽn ka rẽ, Mam bee ne-a yolsgã la segl sõngã la kãndgrã la gũubã la sõngrã a sã n tẽeg Mam yelle. Rënd a sã n tẽeg Mam yelle a nengẽ wã t'a yaa sẽn welg a toor n bak ne Subhaanallaah la Laa'ulaaha ʕlallaah maaneg la zẽng sẽn ka yĩ rënd a, Mam tẽegd-a-la Mam nengẽ. La a sã n tẽeg Mam yell zama suka, Mam tẽegda a yell zama waooglem la a sõmblem sẽn yud zama-kãnga. La ned ning sẽn pẽnega Wënd sẽn zems nug-yakemde, Wënd paasd-a lame t'a paam pẽnegr ne Wënd ne kãntuga. La ned ning sẽn bao pẽnegr ne Wënd t'a woglem ta kanga, Wënd pẽnegd-a lame t'a ta nug-yakemde. La a sã n wa Wënd nengẽ t'a yaa sẽn kẽnde, Wënd wata a nengẽ ne yãgengo. Rënd yamb sã n bao pẽnegr ne a Soabã ne tũudmã la toaglã, a Soabã paasd-a-la pẽnegr, tĩ yaa sẽn na n rol-a ne tuumdã buudu. Rënd muumin tũudmã sẽn pid fãa ne a Soabã, a pẽnegda Wënd (A Naam zẽk yã) Wënd kũunã la a yel-sõmã rolbo, a yũda yambã tuumã la a nongã, la raabã yaa tĩ Wënd keoorã a wila yambã tuuma, zem tĩ yaa a sõmblemã la a waooglemã. Rënd muumin a manegda a tẽebo la a tumdẽ la a yãgdẽ la a paasd a tuumã halĩ t'a wa tug n yek Wënd.

النجاة الخيرية
ALNAJAT CHARITY

